

Damit er deren gelachet/welche zwar viel auff einmal füren müssen/ aber endlich mit einem geringen müssen zu frieden seyn. Darinnen aber die Poeten vnd die Historici etlicher massen sind zu entschuldigen/welche gemeinlich viel auff einmal müssen füren müssen/vnd wie ein Weber von einer Seiten zur andern muß schiessen/wann er ein Stück will aufmachen/ also müssen auch diese thun/vnd gleichsam von einer Seiten/von einem Theil ihrer Schriften auff das andere kommen/damit dieselbige ganz/vnd nach Gebühr fertiget werden: Thun derhalben/wie man siehet/bisweilen einen Sprung aus Europa in Asiam, damit sic/wie gemeldet/jhre Histroien nicht stummeln/sondern ganz vnd vollständlich hinauf führen.

Zum andern/wann der Sribent alle alte vnd verlegene Wort mit Fleiß meydet/eben sowol als die/so zu gemein vnd gering sind/als durch welche seine Rede entweder verdunkelt vnd unverständlich/oder zu gemein geachtet/ja nur aufgelachet wirdt/als wann einer in Italianischer Sprach wolte sich hören lassen mit dem Gente, Guari, Tallotta, vnd andern vergleichen/so nunmehr bey den politioribus bevrlaubet vnd aufgemüsteret sind/vnd in Lateinischer Sprach sich schmücken wolte/ mit solchen Antiquitetten/(wie man heutiges Tags der närrischen Antiquarien findet) die niemand mehr verstehet/vnd man wol alle Cōmentarios müste auffschlassen könne. Dann hie sollte es heißen/wie Phauorinus saget: Verbis præsentibus vtendum & moribus præteritis viuendum: Das ist: Gegenwärtiger Zeit Wort soll man brauchē/vnd nach der alten Sitten leben. Hierzu gehört auch/das die Oration oder Rede ihre gewisse vnd gebührliche Maß habe/vnd die Periodi in rechter Proportion geschlossen

werden:vnd vor allen Dingen/das man alles in geliebter vnd gebührlicher Kürze zusammen fasse/vnd doch in solcher Kürze nichts außlässe/nicht zu kurz abbreche/vnd also nit recht gesasset vnd verstanden werden. Dann es geht auch hie gemeinlich/wie Horatius widerumb sagt:

*Dum breuis esse labore,
Obscurus si.*

Der Fleiß der Kürz mich dunkel macht. Zum dritten/wann sich der Sribent gebürlicher Bescheidenheit gebraucht/nicht alles auff einmal herausstößet/was in seiner vorhabenden Materia kündte gesagt werden/sondern läßt etwas dahinden/das die Ruth auch jhre ährlein nachzulesen habe/vnd andere auch Gelegenheit oder Ursach haben/sich darüber zu exerciren vnd zu üben. Dunkele Sprüche soll er zwar mit allen Umbständen höchstes Fleisses erklären/vnd nicht zu schnell fürüber lauffen/wie ein Hund an dem Orth da er ist geschlagen worden: an den klaren aber soll er sich nicht vergeblich lang aufhalten. In allen beyden aber muß man gewisse Maß halten/vnd ein Exempel an dem Sammen nehmen/welcher/so er zu dick gesetzt wirdt/weinig Frucht bringt/sintemal einer den andern ersticket/seet man ihn aber zu dünn/so nimbt das Unkraut den Platz/vnd wirdt dem guten Samen überlegen/oder aber hat man sonst nicht viel in der Erndte zu hoffen. Dahero auch Horatius weiter sagt:

Est modus in rebus, sunt certi denique fines.

Das ist:

Es hat all Ding ein Ziel vnd Maß/Dessen ein Weiser nicht vergaß. Vnd soll sich derhalben vorsehen/das es ihm nicht gehet/wie den heutigen Philosophis, welche bisweilen eine lange Zeit zubringen/über geringen vnd nichtigen Dingen/streiten über dem Vacuo,vnd euacuiren vnder dessen

Et iij alleit